

Durante nan Reunion General di ATSA di luna di juni 2018

ATSA a pidi un post di Polis na Eagle Beach

Jan van Nes nomina como prome miembro honorario

MIEMBRONAN di Aruba Timeshare Association a reuni pa nan lunch meeting mensual na La Cabana Beach Resort & Casino cu representantenan di mayoria propiedad vacacional di e isla, como tambe varios parternan strategico presente. Presidente di ATSA, Ursell Arends, a yama bon bini n'e miembro y bishitantenan prome cu el a habri e reunion oficialmente cu e aprobacion di e notulanan di e reunion di mei 24, 2018.

Den su discurso di bon bini, el a informa e forum cu directiva di ATSA a dicidi pa no continua cu e consideracion di permiti e proyectonan di condominio pa bira miembronan di ATSA. Arends a informa tambe cu un carta a wordo entrega n'e Consejo Nacional di Turismo solicitando un reunion pa discuti asuntonan relaciona cu turismo, y tambe cu un carta a wordo manda pa Minister di Husticia, caminda ATSA ta propone un post di Polis na Eagle Beach.

E hotelero Jan van Nes a wordo acepta unanimamente den e organizacion como e prome miembro honorario pa bida largo den reconocimiento pa su trabao incansabel pa turismo y ATSA en particular.

Escritora local y ganadora di dos premio di escritor di biahe di Caribbean Tourism Organization, Tina Causey-Bislick, y e artista visual y ilustradora local Vanessa Paulina, cual trabaonan a wordo presenta na exposicionnan den full Caribe, Estados Unidos, Sur America, Europa y Africa, a duna un presentacion cortico tocante nan proyecto camindanan a uni pa produci un buki infantil inspira localmente titula "The Search for Streya".

E buki ilustra cu color ta sigui Jasmira y su ruman homber chikito, Joey, cu ta den un buskeda pa finalmente haya nan prome bistazo di Streya, e turtuga di lama mistico cu nan welo a rescata di un net di pisca hopi aña pasa.

E buki cu ta siña e muchanan tocante e conservacion y tocante e vinculo sagrado entre hende y bestia, a wordo bon ricibi p'e miembronan di ATSA.

CEDE Aruba, Daniel Tecklenborg y Bryan Krozendijk a elabora riba un business case cu nan tabata bezig ta desaroya bao e nomber di "Happy Community Initiative". E iniciativa cu ta atende cu e retonan social local mediante recaudamento di fondo na ocho (8) resort di ATSA, a wordo ricibi cu entusiasmo y CEDE Aruba lo continua cu desaroyo di e proyecto y ta spera di wordo realisa december 2018.

E miembronan tambe a wordo informa tocante un benchmark di salario y beneficianan pa 2018 cual resultadonan lo wordo publica den futuro cercano.

Informacion tocante e proximo "Interval International Info-Exchange Seminar" tabata riba agenda. E evento lo tuma lugar

25 di september 2018 na Hyatt Regency Aruba.

E evento complementario di un dia ta duna un bon oportunidad pa Gerente Generalnan/Owner Service y/of Reservation Managers, Sales/Marketing Executives y otro empleadonan cu ta interactua cu Interval International y propietarioonan di timeshare pa conoce tur e productonan, programanan di suport y servicionan di Interval.

Na mesun momento, e Shared Ownership Investment Conference lo tuma lugar 25 pa 27 di september y tambe lo ta na Hyatt Regency Aruba. Esaki lo t'e di 20 Shared Ownership Investment Conference anual y Resort Managers y nan miembronan di directiva ta invita pa asisti y reuni cu financista, bankero, desaroyador y otro inversionistanan cu ta participa of ta interesa den e sector aki.

E ultimo punto riba agenda prome cu freeword tabata cu e vacaturanan y oportunidadnan pa trabao lo wordo poni riba e website di ATSA; www.arubatsa.com.

